

作者簡介：

丘成桐為哈佛大學數學與物理教授，費爾茲獎、克拉福德獎、沃爾夫獎、馬賽爾·格羅斯曼獎得主，中央研究院院士。
 科普著作有《丘成桐談空間的內在形狀》，並為《數理人文》主編。



九九七年夏，余舉家遨遊河西走廊。是時也，兩兒尚幼，草原嬉戲，駝載馬騎。暮宿於敦煌張掖，看山窟壁畫，臥佛雕刻，戈壁黃沙，海市蜃樓。晨則坐廂車，奔馳於嘉裕蘭州間，登雄關，泛黃河，訪古塔，閱四庫，意甚歡暢。如今兒輩俱已長大有成，猶憶當年，樂何如之。

二十年後，余夫婦舊地重遊，蒙張麗及張福謙等友人慷慨資助，一眾歐美友人、瑞圖夫婦、向洋夫婦、懷東夫婦、李思夫婦、于品夫婦、宋偉夫婦、成棟、李駿、理真、張俊等七十賢俊，結隊成行，登山望遠，憶古思源，一一印證我等書本上之所見所聞，故友言歡，聚首一車之內，意氣偉然，信可樂也。

余等縱遊河西走廊之山岩洞窟，但見壁畫輝煌，佛像林立。敦煌莫高，安西榆林，積石炳靈，天水麥積，千年西域古蹟也，始建於前秦後秦，迄於宋元，誠東西文化交流結晶，人類之瑰寶也。

復覽大地遺址，至於秦安龍城，天水成紀。導遊云此七千年前之古蹟也，兩皇女媧伏羲之故地乎。

余少年時喜讀史記、漢書、三國志、廿四史、資治通鑑等史籍，故紙書墨，所述所評，宛然在目，激情尚在，能不感懷？

玉門故壘，陽關遠眺，但見落日黃沙，大漠茫茫，祁連雪積，月牙泉澈，漢築長城，蘆葦疊疊，明立雄關，兵威烈烈。東西商旅，往迹依然，文物古今，家國承傳。望璀璨丹霞，心蕩神移，見故國旌旗，能不依依。中心感之，遂作此賦。

第一章 序

仲夏日之赤熱兮何以解憂？

浩浩乎攜諸生以傲遊。

郁郁乎探百代之榮休。

縱余日以游觀兮嘆先賢之可任，
 覽史冊之所載兮慕古聖之流芳。
 出玉門以遠眺兮覓漢唐之遺蹤，
 歎黃沙之無盡兮掩千古之恩讎。
 倚陽關之頽垣兮望遠處之高岑。
 背祁連之積雪兮臨弱水之支流。
 豈日曠千里兮實玉化起乎河州。
 惟月照古今兮東西之故迹長留。

第二章 遠古至先秦

一. 史前時代

戈壁遍野兮商旅難籌，
 平沙無垠兮田隴誰耕？
 馬騰大漠兮駝越沙丘。
 枯草難牧兮獸鋌亡群。
 大漠茫茫兮骸骨誰收？
 長路綿綿兮過客頻仍。
 冰封祁連兮水澤沙州。
 大地灣開兮文化始由。
 畫陶彩繪兮書直藏勾。

二. 傳說時代

1. 文化之源

華胥履跡兮隴西成紀。
生女女媧兮生男伏羲。
天荒地亂兮諸侯無忌。
共工治水兮不敵祝融。
頭觸不周兮天塌民怨。
煉石補天兮作筮制簧。
仰觀天象兮俯察大地。
始畫八卦兮造書代繩。
骨甲篆刻兮類物象形。
治麻爲布兮始著衣裳。
結網佃漁兮嫁娶是定。
制陶器兮火燒烤。
作曆法兮定日月。
阪泉敗陣兮姬羌合流。
倉頡造字兮黃帝垂拱。
涿鹿鏖戰兮大地霧垂。
作車指南兮蚩尤竄逃。
始蓋宮室兮軒轅望遠。
封禪泰山兮登高寡仇。

成桐按：伏羲女媧，神農軒轅之事，渺不可考。史公周遊天下，問諸父老當年史迹，不敢定其真偽，言不雅馴而已。史記記載伏羲女媧，出於泰安成紀，灋水經泰安而入渭河，殆中原民族之發源地乎？歷代緯書以伏羲爲龍身人首，古之圖騰也。大地灣遺址已有文字畫圖之雛形，或可佐證。然而河

圖洛書八卦之說，多有附會。至於阪泉涿鹿兩次大戰，抑或有之，其可考乎？

2. 夏朝

堯舜禪讓兮天水灌地。
努身焦慮兮帝禹疏導。
降伏三苗兮地安民靜。
雖平九土兮西戎已聚。
刻鑄九鼎兮世襲始建。
夷蠻戎狄兮地在要荒。
凶悍不仁兮掠我邊周。
四夷莫守兮軍旅無極。
不恤民事兮太康失守。
后羿善射兮有窮代夏。
寒浞行媚兮奪妻烹羿。
少康中興兮嬖於有虞。
有田一成兮有眾一旅。
以寡敵眾兮重建夏后。
篤好鬼神兮孔甲亂國。
桀寵妹喜兮內政不修。
奴虐百姓兮瓊室瑤台。
關龍死諫兮悲憤難收。
時日曷喪兮與君俱亡。
鳴條大戰兮諸侯三千。
商湯滅夏兮朝代更迭。

按：春秋以還，古聖先賢極道堯舜禪讓、帝禹治水、少康中興、商湯繼夏之事。夏遺民於杞，及至春秋，孔子已有杞不足徵之歎。清華大學設夏商周

斷代工程，欲探其究竟，唯夏代傳說，至今未為信史，誠可惜也。

要之，堯舜之世，中國未得一統。堯舜禹俱為眾部落之共主，非禪讓不足以服眾。

禹治水有功於百姓，立威而誅殺防風氏，及皋陶氏早死，禹傳位於伯益，而實權歸其子啟。禹死，啟殺伯益及有扈氏，夏后始大。中華三千年傳子之制度從此立矣。

寒浞殺羿、少康中興、夏桀荒淫、鳴條大戰等事，俱不可考。然而鳴條大戰，諸侯竟有三千。可知諸侯俱是小部落，大致不及百人也。有虞氏則為大部落，舜曾為有虞氏之主，少康中興，至於武王克商，有虞氏皆預其事，周封有虞氏於陳，部落社會進步為封建之過程乎。

三．信史時代之商朝

夏遺民祀兮北祖匈奴。
定都於亳兮氐羌來朝。
伊尹為輔兮太甲放桐。
三年還政兮百姓以寧。
視遠惟明兮聽德惟聰。
太戊承德兮九世其亂。
盤庚遷都兮政唯祀戎。
諸侯來朝兮殷道復興。
武丁踵德兮始作卜辭。
婦好領軍兮護我商方。
祭天祀祖兮征服不朝。
甲骨記事兮信史可徵。

按：王國維以安陽出土之甲骨文字考證史記殷商十三王世系，商代故事遂成信史。然而伊尹放太甲於桐，未可盡信。婦好之名，未見於古籍，而其墓出土安陽，歷代能戰女將之首也。殷人尚鬼，國之大事，唯祀與戎。

四．西周代商

涉彼南崗兮公劉遷豳。
太王避狄兮搬居周原，
始設社稷兮季歷繼位。
征服鬼方兮大勝狄戎。
西伯侍紂兮遠囚羑里。
武王奮起兮疆土厥張。
三分天下兮周居其二。
任用姜尚兮遷豐克崇。
商征東夷兮周乘其蔽。
六師並馳兮會於孟津。
左杖黃鉞兮右把白旄。
諸侯用命兮牧野克商。
血流漂杵兮帝辛自焚。
縱馬華山兮放牛桃林，
示不用兵兮行義天下。
周雖舊邦兮其命唯新。
定都鎬京兮周召是命。
分封功臣兮屏藩周室。
興周克殷兮太公封齊。
五侯九伯兮實得征之。
郊祭文王兮封旦於魯。
大啟爾宇兮為周室輔。

召公佐王兮文武成康。
甘棠遺愛兮封燕都薊。

按：文王得太公於渭水之濱，征服四夷，三分天下有其二，其於商紂，以大事小，孔孟稱之。太公佐武王，乘紂王征伐東夷中原空虛之便，克商於牧野。太公在齊，簡禮從俗，法立令行。管仲繼之，法教並重，君臣上下貴賤俱得從法。百年後鄭國子產鑄刑法於鼎器上。戰國諸侯變法者眾，魏國有李悝，趙國有慎到，韓國有申不害，秦國有商鞅，韓公子非則總其成，從此中國歷代政治以法為骨矣。

史記齊太公世家曰：後世之言兵及周之陰權，皆宗太公為本謀。太公兵法乃中國歷代兵法之祖，原書早已失傳。春秋末孫武作兵法，殆其流派乎。戰國時鬼谷子亦學太公兵法，孫臏、蘇秦、張儀等俱出其門下，而道家思想源於兵法，可知道法二家思想皆源於太公也。

太公封於齊，周公制禮作樂，封於魯。召公安定周室天下，封於燕。此三公者，周朝八百年歷史之最大功臣也。齊魯文化，中華文化之核心乎？

五. 西周王化

平三監兮滅武庚。
存亡國兮繼絕世。
保民立命兮孝祖敬天。
定國創業兮制禮作樂。
王官采詩兮民風是觀。
頌德祭祀兮大雅周頌。
溫柔敦厚兮小雅國風。

成康大治兮東都洛陽。
輔佐王室兮周公吐哺。
授田於民兮明德慎罰。
穆王西伐兮犬戎未平。
昭王南征兮船渡不返。
周室失統兮諸侯專征，
封疆不固兮戎狄乘間。
招誘安撫兮中國錯居。
國民暴亂兮厲王出奔。
政稱共和兮宣王中興。
諸侯不睦兮西戎敗績。
三川皆竭兮岐山崩裂。
幽王寵姬兮廢后去嫡。
申侯賣國兮犬戎擄掠。
王死驪山兮宜臼東遷。

按：孔子曰：周監於二代，郁郁乎文哉！吾從周。周公制禮作樂，孝祖敬天，儒家之所本也。祭祀傳宗，存亡繼絕乃中華文化特色，溯源於夏商。親親而仁民，仁民而愛物，放諸四海而皆準。周公孔子，德蓋千秋矣！詩三百篇，多作於周初。詩篇外，後世亦有言文王作易八卦、周公作周髀算經者，俱未可盡信。二書源遠流長，後人必有所增益也。至於周室封建，分封諸侯，籠絡天下，中國得以一統，功莫大焉！



莫高窟第45窟——彩塑。(Flickr·emperornie攝)



六. 春秋時代

1. 秦晉之好

a. 秦

平王荏弱兮鄭莊小霸。
五質公子兮周桓被傷。
力救周室兮秦襄封伯。
大戰犬戎兮賞賜岐豐。
用百里奚兮蹇叔王佐。
計得由余兮遂霸西戎。
國小志大兮謀并天下。
既平義渠兮復求東進。

按：賈誼過秦論謂秦併吞天下之志，始於孝公。其實秦之先世，志已及此。事可溯源於穆公，穆公吞蜀平戎，助重耳返晉，是時也，秦地處西陲，地寡而志大，深思熟慮，歷二百餘載，終成中國統一大業。

b. 晉

成王胞弟兮周封唐虞。
昭侯繼位兮晉都翼城。
曲沃桓公兮三世代翼。
獻公征戎兮驪姬得寵。
錯立奚齊兮中生自剄。
秦助夷吾兮惠公毀諾。
晉修秦好兮重耳返國。
聚賢有才兮趙魏狐先。
平王子帶兮晉文始興。

楚成侵宋兮城濮大戰。
退讓三舍兮子玉自裁。
文公稱霸兮遂盟踐土。
鄭臣說秦兮穆存貳心。
因喪伐鄭兮軍滅於肴。
晉控桃嶠兮秦阻關中。
襄靈續霸兮宣子執政。
先卻同盟兮趙盾弑君。
晉立成公兮楚侵陳鄭。
車馳卒奔兮楚莊北征。
會戰於泌兮晉師敗績。
呂相絕秦兮厲公勝仗。
敗楚鄢陵兮宋倡弭兵。
晉霸中原兮百五十載。

按：晉佔中原之地，承周之舊德，實有一統天下之力。然而內無公族，六卿互爭，終至滅亡，此亦人主之戒也。強本弱枝，疆土難張。強枝弱本，則諸侯霸權。

2. 姜齊

太公封齊兮都於營丘。
順民簡政兮期年返國。
開山爲銅兮煮海爲鹽。
國以大富兮遂霸中原。
襄公被弑兮二子出逃。
鮑叔佐君兮臨淄即位。
不記舊惡兮夷吾得用。
改制興邦兮齊國大治。

會盟於柯兮還魯侵地。
尊王攘夷兮桓公稱霸。
深入流沙兮西征大夏。
北伐山戎兮贈地燕莊。
擊宋責楚兮芑茅不貢。
一匡天下兮九合諸侯。
召陵合盟兮以德綏眾。
桓德不終兮夷吾先逝。
未納忠言兮任用奸佞。
五子爭位兮身死不葬。

按：齊桓公重用管仲，九合諸侯，一匡天下。尊王攘夷，爲春秋五霸之首。孔子稱之，曰：微管仲，吾其披髮左衽矣。然而桓公未納管仲臨終前諫言，任用奸佞小人，致五子爭位，身死而蛆出於戶，悲夫！

3. 荊楚

荊楚在南兮高陽苗裔。
祝融之後兮遷徙丹陽。
尊三天兮辨四極。
信巫鬼兮重淫祀。
托物起興兮辭頌天地。
鳳鳥飛騰兮繼以日夜。
周王南征兮中渡沈舟。
穆王西伐兮徐偃叛亂。
楚人援周兮根基始壯。
立足江漢兮稱號蠻夷。
周封諸姬兮以控荊漢。

遷都於郢兮成王大治。
齊桓伐楚兮稱盟召陵。
莊王承統兮三年自靜。
任用叔敖兮一鳴驚人。
伍舉蘇從兮賢士濟濟。
飲馬黃河兮伐陸渾戎。
觀兵周疆兮楚子問鼎。
會泌大戰兮聯秦制晉。
滅陳復陳兮四方朝楚。
圍宋九月兮華元爲質。
崛起天南兮楚其霸矣！

按：周昭王南征不返，管仲以此罪荆楚，事已難考。然而荆楚之興，始於平王東遷。楚人自稱蠻夷，誅滅漢陽諸姬。莊王稱霸天下，竟問鼎周室！徵諸楚辭，楚豐饒之地也，雲夢大澤，山川形勝，江漢之間，百姓富饒，而又驍勇善戰，自古將帥，多出於其間。楚辭騷體，源自屈原。蒼涼悲惻，纏綿有致，其文體異於北方之詩歌，爲南方文學之祖。項羽劉邦歌詠，均作楚聲，未知楚聲何如也。

4. 吳越

泰伯東奔兮吳越附楚。
巫臣聯吳兮晉爭楚霸。
教戰騎射兮壽夢奮起。
季札避位兮北觀周樂。
心誠使晉兮徐州掛劍。
西侵荊楚兮闔閭稱雄。
政由子胥兮軍由孫武。

柏舉之戰兮長驅入郢。
鞭平王墓兮包胥哭秦。
秦師救楚兮昭王得歸。
闔閭征越兮傷趾而逝。
夫差復仇兮大敗勾踐。
吳盟齊晉兮北會黃池。
越王侍吳兮引辱負重。
用大夫種兮范蠡爲謀。
十年教訓兮十年生聚。
亡吳姑蘇兮夫差自刎。
越霸東南兮陶朱遠遁。
飛鳥盡兮良弓藏。
狡兔死兮走狗烹。
越誅良臣兮圖霸天下。
北向擊齊兮卒亡於楚。

按：春秋之際，吳越始興，根基未定，即伐楚盟齊，與中原爭霸！宜乎早滅於楚也。

5. 魯國

周公封魯兮伯禽治國。
奉周禮樂兮郊祭文王。
北至泰山兮南達徐淮。
東至海疆兮西抵定陶。
爲周強藩兮定都曲阜。
魯桓弑君兮遂謀侵杞。
殺妻求將兮吳起敗齊。
政在三桓兮叔孫季孟。
公室失權兮魯亡於楚。

周禮在魯兮千載德流。
丘明左史兮春秋國語。
爲百世師兮仲尼孟子。
問道老子兮儒道傳世。

按：周公封於魯，五百年後而聖人出。至今齊魯士樸而民風淳厚，信乎聖人之教，千載之功也。

七. 戰國時代

1. 三家分晉

晉無公族兮六卿分權。
滅范中行兮智趙韓魏。
智伯索地兮趙襄不辱。
水淹晉陽兮韓魏倒戈。
三家分晉兮晉留絳曲。

a. 魏

文侯尊師兮子夏田段。
樂羊爲將兮李悝變法。
吳起攻秦兮得地河西。
既滅中山兮掠齊敗楚。
惠王失賢兮商鞅侍秦。
孫臏將齊兮敗魏馬陵，
信陵合從兮含屈而終。
水灌大梁兮王賁滅魏。

b. 韓

韓厥始興兮哀侯滅鄭。

昭侯變法兮任用不害。
內修政教兮外應諸侯。
韓興十載兮終逼於秦。
賢臣侍秦兮韓非鄭國。
困而降秦兮地置潁川。

c. 趙

叔帶入晉兮衰侍文公。
趙雍整軍兮胡服騎射。
圖霸天下兮逕窺秦宮。
大破林胡兮擊滅中山。
兄弟分國兮主父餓死。
秦敗荊楚兮燕趙侵齊。
相如爲相兮廉頗爲將。
惠文用奢兮破秦闕與。
既霸關東兮取韓上黨。
王齧攻趙兮廉頗堅壁。
拒聽虞卿兮媾和於秦。
范雎反間兮趙括爲將。
長平大戰兮白起代齧。
坑殺趙卒兮四十萬眾。
齊魏救趙兮頗守邯鄲。
李牧定邊兮破燕攻秦。
反間誅將兮王翦滅趙。

按：三家分晉後，韓趙魏未能攻守同盟，終失天下。魏文侯尊文尚武，變法圖強，惜乎惠王見孟子而只問利，不任賢能，信陵君鬱鬱而終，魏遂亡於秦。韓昭侯任用申不害，惟變法未成。而後韓非事秦，鄭國治水，韓才秦用，宜乎韓之敗於秦也。三

家諸侯，以趙武靈王爲最盛，胡服騎射，幾霸天下，惜乎傳位不慎，餓死沙丘。長平之戰，趙失其銳。李牧守邊，大破林胡，益地千里。秦用反間，趙誅李牧，自召滅亡，信可嘆也。

2. 燕

燕噲禪位兮子平不服。
齊攻燕地兮殺王子之。
昭王繼位兮任用郭隗。
築黃金臺兮招賢納士。
吊死問孤兮與民共苦。
樂毅爲卿兮鄒衍爲輔。
厲精圖治兮報仇破齊。
秦開爲將兮卻胡千里。
惠王即位兮樂毅奔趙。
秦吞邯鄲兮王賁滅燕。

按：商末，箕子出走燕地，至於朝鮮。燕趙多勇士，樂毅下齊七十城，幾滅血食八百年之齊。及其見疑於惠王，去燕事趙，報燕王書云：忠臣去國，不潔其名。思之使人悽愴。樂君志潔行廉，後世忠臣去國之典範也。

3. 荊楚

勾踐讓淮兮惠王滅杞。
拓土泗水兮江淮之北。
悼王圖治兮吳起變法。
未成而逝兮大將伏屍。

威王滅越兮南有巴渝。
張儀詐楚兮懷王見欺。
讒言誤主兮屈原放逐。
君王拒諫兮客死咸陽。
抑鬱吟誦兮離騷傳世。
春申爲尹兮救趙滅魯。
蘭陵聚賢兮孟子荀卿。
考性善惡兮著書立言。
蘇張侈陳兮荀子作賦。
宋玉坎坷兮九辯悲秋。
始作對問兮高唐神女。
春申避秦兮遷都壽春。
李園弑主兮項燕爲將。
雖敗李信兮王翦滅楚。

按：戰國之世，秦欲吞併天下，遂有蘇秦張儀之徒，合從連橫。秦實爲主導，齊楚趙則爲六國之首領。楚威王奮起，用孫臏，霸諸侯。惜乎懷王荏弱，雖有屈原春申之賢，楚齊未能同心，終爲秦所滅。然而楚之蘭陵，齊之稷下，天下聚賢之地也，處士橫議，百家爭鳴。當是時也，中華文化，不遜於雅典文明。

4. 田齊

欺君惠己兮田氏篡齊。
威王奮起兮一飛衝天。
任賢選能兮即墨大夫。
鄒忌爲相兮孫臏爲將。
宣王攻燕兮聯楚攻秦。

稷下招賢兮處士橫議。
百家爭鳴兮孟軻述仁。
荀卿仲連兮接子宋鉞。
始述黃老兮慎到環淵。
遠交近攻兮秦賂齊臣。
合縱漸成兮齊遠五國。
湣王滅宋兮南侵荊楚。
西侵三晉兮圖吞二周。
樂毅爲將兮燕昭攻齊。
下城七十分齊失其銳。
田單復齊兮王建降秦。

按：陳完子自陳入齊，改姓田。爲齊工正，大斗出而小斗入，以公謀私，竟得民心。八世孫田和遂篡姜齊。田氏得國以姦，然而威王用人唯才，稷下賢士，與楚之蘭陵相輝映。惜乎湣王未知量力，齊楚未盟，而窮兵黷武，大敗於燕。爾後王建自保，坐而待斃，齊其亡矣。

5. 先秦

a. 孝公

孝公求賢兮尊官裂土。
衛鞅入秦兮攜魏法經。
王道迂闊兮公謀霸業。
變法以治兮更禮以教。
改戶籍兮行連坐。
明軍法兮勵軍功。
重農桑兮抑商賈。
開阡陌兮廢井田。

制轅田兮行縣制。
燔詩書兮一度量。
塞私門請兮遂公家勞。
立竿賞金兮重法剝虔。
反齊合從兮南破強楚。
詐公子卬兮商君破魏。
收河西地兮復秦舊業。
志捲宇內兮孝公早逝。

按：秦孝公有吞併宇內，席捲天下之心，商君說之以王道而不受，遂用李悝法經，輔之以連坐，賞罰分明，民勇於公而怯於私。秦國富強，迥異於前矣！商鞅變法，前無古人，後無來者，功至於始皇帝之一統天下。然而商君謀詐公子卬，刻薄寡恩，雖復秦舊業，罪及秦之客卿及惠文公。孝公死，商君亡魏而不得入，卒至五馬裂屍，爲天下變法寡恩者戒！善始者未必善終，其此之謂乎？

b. 惠文帝

惠文稱王兮重用客卿。
宗室多怨兮車裂商君。
用公孫衍兮司馬爲將。
攻魏欺楚兮西取巴蜀。
陷楚丹陽兮得地漢中，
攻破合縱兮張儀連橫。

c. 昭襄王

武王呈力兮扛鼎絕臄。
昭襄承位兮母族當權。
誘滅義渠兮宣后獻身。

魏冉爲相兮連橫齊魏。
威振諸侯兮白起爲將。
料敵合變兮出奇無窮。
攻殺無數兮伊闕長平。
天下難敵兮賜劍杜郵。
應侯說王兮遠交近攻。
太后憂死兮穰侯放陶。

d. 莊襄王與呂不韋

子楚質趙兮昭王嫡孫。
奇貨可居兮呂氏籌謀。
秦圍邯鄲兮王子返國。
莊襄繼位兮不韋爲相。
游士立說兮合作春秋。
懸書咸陽兮一字千金。
蒙鶯爲將兮得地趙魏。
信陵合從兮秦退函谷。

按：君變法後，國富民悍。秦王西取巴蜀漢中，母后用計，併吞義渠。縱觀秦之大成，實始於重用客卿之國策也，及白起坑趙卒四十萬，三晉從此不振，秦亦受損，延至始皇帝，方成統一大業。

e. 秦王

幼年繼位兮仲父爲相。
不韋淫后兮嫪毐爲亂。
弱冠垂拱兮去韋誅嫪。
任命李斯兮賜死韓非。
刑名治世兮術學荀子。
重任客卿兮兵強將勇。

內史王翦兮蒙武王賁。
鄭國渠成兮千里沃野。
利誘處士兮連橫離間。
法紀嚴明兮十年征戰。
攻滅海內兮遷虜咸陽。

按：秦王幼年即位，弱冠即逐呂不韋，奪母后權，垂拱專政，大用客卿，承四世之餘威，誅滅諸侯，開中國二千年大一統之局面。立法垂典，一文字，修長城，築馳道，大哉嬴政，大哉秦漢！

八. 中國大一統

1. 秦始皇帝

攘胡走越兮始皇一統。
立郡縣制兮廷尉李斯。
創篆立規兮道傳千載。
尊始皇帝兮焚書坑儒。
勒石記功兮泰山瑯琊。
小篆頌德兮虯龍飛舞。
恬築長城兮民以安寧。
西起臨洮兮竟海為閼。
修建直道兮逶迤遠行。
北起九原兮南至雲陽。
大將守邊兮孰敢向南？
修宮殿兮築馳道。
定度量兮立法則。
鑄金人兮焚圖書。
一文字兮定四海。

巡視四方兮暴斃沙丘。
趙高盜國兮李斯佐惡。
扶蘇自刎兮胡亥篡位。
記仇報恨兮蒙氏喪命。
指鹿為馬兮李氏族夷。
功比周召兮過實亡秦。
華亭鶴唳兮憶犬上蔡。
郡縣初立兮諸侯叛秦。
軍事中虛兮兵戍南北。
築基建宮兮民力殆盡。
戍卒三百兮陳勝起義。
大起囚徒兮秦守咸陽。
兵敗項劉兮子嬰出降。

按：始皇一統天下，中華民族之大事，夫立法紀，一文字，修長城，築馳道，定度量，與生民有利，德澤千古之事也。而歷代史家詬病始皇，蓋未知匈奴之強悍，百越之難平，而中國一統之匪易也。至於築宮室，建墳墓，民力大竭。雖始於始皇，二世實主其事。由此觀之，傳承之事，可以興邦，可以喪邦。趙高一宦者耳，偽造始皇遺詔，賜劍扶蘇蒙恬，又矇騙二世，指鹿為馬！李斯為秦相，竟與之合污，腰斬咸陽，不亦宜夫。當始皇之際，李斯之功，可比周召，及其縉戀權力，與趙高同謀矯詔，此所謂一失足成千古恨者也。

2. 楚漢相爭

大澤起義兮陳涉吳廣。
揭竿為旗兮鴻鵠為志。

眾才數百兮疲卒叛秦。
張楚忘危兮諸侯蠱起。
秦殺義士兮楚起隴畝。
項梁首領兮羽爲其輔。
范增謀策兮奉立義帝。
秦擊定陶兮章邯敗楚。
項羽救趙兮擊擊宋義。
破釜沈舟兮鉅鹿大戰。
諸侯膝行兮秦將降楚。
劉邦起沛兮劍斬白蛇。
蕭何曹參兮周勃樊噲。
爭戰十年兮立漢基業。
博望椎皇兮張良輔漢。
高祖謀國兮隱志投楚。
先羽入關兮約法三章。
灞上抗楚兮鴻門赴宴。
項莊舞劍兮志在沛公。
分裂天下兮羽封王侯。
高祖入蜀兮子房歸韓。
燒絕棧道兮示楚無憂。
將士流失兮蕭何追信。
登壇拜將兮遂擊三秦。
明修棧道兮暗渡陳倉。
羽殺韓王兮張良復歸。
楚擊田齊兮漢襲彭城。
併日急返兮楚騎三萬。
漢兵潰敗兮劉邦亡命。
蕭何助守兮良平離間。
楚失范增兮漢得彭越。
信用奇計兮平趙燕齊。

邛溝爲界兮漢王悔盟。
兵圍垓下兮四面楚歌。
恥渡烏江兮霸王自刎。

按：秦失其政，諸侯逐鹿，項氏叔侄，承楚國之餘蔭，起隴畝之中。立懷王而令諸侯。羽以八千子弟渡江，破釜沈舟，大破秦軍，諸侯膝行，不敢仰視。楚雖三戶，亡秦必楚，其此之謂乎。當此之時，羽不行仁義於百姓，自矜功伐，釋沛公，封諸侯，疑范增，放韓信。放逐義帝而自立，號稱西楚霸王。羽欲得天下，實乎難矣。然而羽力能扛鼎，善戰，將三萬騎大破劉邦五十六萬大軍於彭城，漢王喪胆，棄妻推子，自古以來，未嘗有也。

漢王起沛縣，蕭何、曹參、樊噲、周勃等皆隨沛公起事，不離不棄。楚漢相爭，漢王屢敗屢戰，以關中兵源糧餉，不絕於路，蕭何之力也。是故漢初大封功臣，蕭相國名列第一。高祖起張良、韓信、陳平、彭越於楚營，知人善任，俱立大功。張良謂漢王天授，韓信則稱高祖善將將。蕭規曹隨，漢家四百年天下，垂典中國，豈偶然哉。

第三章 兩漢風華

一. 西漢

1. 高祖平定諸王

關中沃野兮定都長安。
異姓封王兮籠絡有功。
信據楚地兮越封定陶。

韓彭蒯醢兮帝征英布。
寵愛戚后兮欲傳如意。
子房用計兮商山四皓。
羽翼已成兮高祖楚歌。
蕭樊囚繫兮惠帝始立。

2. 漢初匈奴爭戰

秦築陶磚兮往跡難尋。
漢留片土兮葦草爲牆。
匈奴坐大兮秦漢交錯。
猛將如雲兮高祖伐胡。
冒頓入北兮圍我白登，
將帥不敵兮雨雪無餉。
士出奇謀兮閼氏縱歸。
霧濃人靜兮矢弩外向。
四海一統兮邊方未定。
大風起兮雲飛揚。
安得猛士兮守四方。
劉敬謀國兮漢胡和親。
哀遣公主兮遺之遠疆。
穹廬爲室兮乳酪爲漿。
苦思故土兮心神內傷。
夫死婦營兮呂后專政。
單于褻嫚兮未敢言羞。
治由黃老兮天下晏然。
與民生息兮安而復昌。

按：當秦漢之際，匈奴崛起。以始皇之強，蒙恬之勇，率三十萬衆擊胡七百里，然後築長城守之而

已矣。高祖內亂未平，民未脫困，受叛臣韓王信誤導，率三十二萬衆，欲平匈奴，而冒頓單於誘之，四十萬騎圍高祖於平城。是時也，高祖猛將有夏侯嬰、陳豨、周勃、樊噲，謀臣則有劉敬、陳平，然而終被困於白登，七日不食，謹乃得免。劉敬始提和親，中國得以休養生息，大風歌嘆猛士守邊之難覓，蓋謂此也。呂后吞聲受辱，三世至於武帝，始報高祖困於平城之恥，漢人忍辱負重，可謂深矣。

3. 惠帝繼位，呂后專政

戚后得寵兮幾易太子。
周昌期期兮叔孫死諫。
四皓佐盈兮惠帝即位。
蕭規曹隨兮政由黃老。
減民徭役兮除挾書律。
仁柔慈孝兮抑鬱而終。
少帝即位兮呂雉臨朝。
大封呂氏兮劉恭廢黜。
雉死族移兮弘復被廢。

4. 文景之治

安劉誅呂兮周勃陳平。
恭儉遵業兮文景敦化。
輕徭薄賦兮黃老治術。
上無苛令兮官無煩治。
虛懷納諫兮輕刑慎罰。
郡國並行兮分封諸劉。
諸侯抗命兮賈誼治安。

亞夫領軍兮七國得平。
集權中央兮郡縣始成。
匈奴日驕兮襲我甘泉。
軍屯細柳兮守我邊疆。

按：文景之治，與民休息。然而賈誼獻計，中央集權，雖有吳楚之亂，民不思變。余觀長沙軟侯利蒼家族之墓，墓葬於文帝初年，棺槨宏偉而裝飾華麗，可知其時國富民強，足以開漢武之盛世也。

5. 武帝拓邊

五世其休兮生民倍增。
太倉多粟兮陳陳相因。
國富兵強兮遂謀西疆。
祖母無爲兮黃老是依。
罷黜百家兮儒術獨尊。
選賢與能兮政法惟剛。
羞遣公主兮孝武逐北。
太后崩殂兮始城朔方。
利誘匈奴兮王恢用策。
三十萬衆兮馬邑伏軍。
單于逃逸兮遂斷和親。
濟濟多士兮竟霸河西。
雄關似鉄兮商旅萬方。
五十四載兮承秦啟後。
協音律兮定曆數。
興太學兮改正朔。
起察舉兮選賢能。
千古一帝兮人懷厥德。

按：帝承三代積蓄，外征匈奴，內立儒術。允文允武，千古一帝。用人唯才，宜乎漢帝國留名古今。班固評述：歷代用人，於斯爲盛。

6. 張騫通西域

斷匈奴右臂兮博望月氏之行以求！
歷艱苦猶持漢節兮豈被擄之可羞。

去歲十三兮二人得還。
徑國卅六兮西域始通。
酒泉初置兮復設武威。
既破樓蘭兮又破車師。
得馬大宛兮蜀布何由？
蒲陶苜蓿兮植之離宮。
將軍識途兮知虜之可傾。
大帝思遠兮征伐乎邊方。

按：自古艱難爲一死，張騫出使大月氏，蘇武牧羊北海，九死一生，不辱君命，功誰堪比。博望侯西域十三年，所閱所聞，回報天子，開漢家四百年拓土衛國之機，可謂中國使節第一，玉門關銅像雕塑，立馬迎風，不亦宜乎。

7. 貳師降虜

絕世佳人兮延年頌歌。
傾國傾城兮歿留帝恩。
謀善馬兮外戚遠攻。
士卒物故兮孝武怒遮玉門。

涉流沙兮天馬歸。
承靈威兮降外國。
破大宛兮廣利侯封。
漢立張掖兮敦煌始雄。
祝詛天子兮憂懼愁慌。
虜入五原兮陷我名城。
將兩萬衆兮深入要功。
軍敗燕然兮貳師辱降。

按：武帝寵愛李夫人，派李廣利出征，欲其封侯也。然而漢法至嚴，廣利欲退而武帝竟遮玉門關，可知武帝用人之一斑。

8. 衛青破虜

出車彭彭兮長平始擊匈奴。
萬騎出塞兮黃沙擊我矢弓。
風嘶嘶兮馬鳴，
奇兵出兮虜驚。
趙信城崩兮漢胡相搏，
利鏃穿骨兮殺氣凌空。
單于遁逃兮右王逆謀。
漠南無胡跡兮大將封！

9. 李廣難封，蘇武南歸

龍城將飛兮威振天涯，
力敵萬騎兮馬急胡走。
勇冠三軍兮矢貫深岩，
將軍失道兮漢表劉首。

木訥少言兮天下涕流。
長子復仇兮驍驍射殺。
孫字少卿兮氣衝斗牛，
都尉少壯兮兵出居延。
單于臨陣兮眾寡懸殊。
力盡矢窮兮李陵降虜。
武帝震怒兮闔家被戮。
不蒙明察兮史遷腐刑。
河梁送別兮蘇武南歸。
老母終堂兮生妻去帷。
流離辛苦兮幾死朔北。
雁飛雲邊兮隴上煙寒。
官典屬國兮漢宣記功。

10. 霍去病平定南匈奴

漢設四郡兮斷絕南羌。
匈奴未滅兮何以家爲？
驃騎奔逐兮寄身刀鋒，
勢崩雷電兮地動天搖。
徑絕大幕兮封狼居胥。
臨翰海兮胡虜移，
禪姑衍兮月明中，
大將天折兮茂陵立祠。

按：武帝開拓朔方以後，全力擊胡。張騫出使，已得匈奴地理形勢，李廣、衛青、霍去病出塞數千里，屢擒名王，封狼居胥，南匈奴降漢。治胡之功，自古以來，未嘗有也。武帝一洗高祖吞聲忍氣，中國邊疆百姓備受凌辱半世紀之苦，何其壯也。

11. 武帝輪臺罪己

日光冷兮矢盡弓藏，
月色苦兮孤雁飛高。
五分一存兮漢馬亡，
雖得陰山兮血滿溝。
輪臺罪己兮百姓復農，
禁苛止賦兮與民息休，
六畜蕃息兮黍稷復盈。
日磾輔政兮西風吹襟。

按：秦末漢初，冒頓單于強悍，而老上單于繼之，自高祖至文帝周亞夫守邊，俱無可如何。至武帝征匈奴，乃中國生死存亡之事。天祐中華，將士用命，南匈奴降漢。然而民力殆盡，武帝傷之，遂有輪台罪己之詔，能伸能屈，中國百姓得以休息，千古以來，帝強而能罪己者，未嘗有也。

12. 昭宣中興

昭帝承嗣兮鈎弋之子。
孝武托孤兮霍光輔政。
匡安國家兮漢家之寄。
司農征召兮賢良文學。
均輸鹽鐵兮抑制豪強。
弱冠察忠兮燕謀難聘。
誅桑弘羊兮復滅上官。
劉賀繼位兮猥瑣難堪。
太后廢帝兮伊尹故事。
孝宣得立兮司馬忘身。

黨親連體兮根遍朝野。
立女爲后兮如芒在背。
死才三載兮宗族誅夷。
王霸雜用兮遠結烏孫。
大敗匈奴兮西域都護。
麒麟畫像兮功臣十一。
子孟爲首兮孝宣宏德。

按：武帝托孤，霍光輔政，歷昭宣二朝，匡安國家，功比周召。惜乎晚年未盡收斂，陰妻邪謀，立女爲后。賢君如宣帝，亦有如芒在背之感。霍光死後家族被誅，不亦宜乎。然而霍光墓留茂陵，又圖形麒麟閣，功臣第一，宣帝亦可謂報德矣，可知西漢諸帝之重賢也。

13. 昭君出塞

明妃失意兮漢家樓閣，
高山峨峨兮河水泱泱。
手揮琵琶兮平沙雁落。
中心惻傷兮遠度西羌。
白日西匿兮關山蕭索。
燕絕異域兮腸斷淚乾。
飲咽無聲兮故鄉永隔。
胡鞞鼓喧兮胡姬侍安。
單于寵愛兮邊城未拓。
三世無警兮少見干戈。
和樂且閑兮穆穆棣棣。
胡族漢化兮澤被邊疆。

按：昭君出塞，歷代傷之。然而明妃出宮，得見天日，遠勝於鬱鬱而終。且漢胡因此和平六十餘年，功莫大焉。

昭君本名王嬙，漢元帝之妃也。元帝柔仁好德，在位十六年。在位時，匈奴分兩支：郅支單于及呼韓邪單于。郅支爲陳湯所滅。王嬙嫁呼韓邪單于，爲寧故闕氏。邊陲遂無兵革之事，元帝因此改年號曰竟寧。

元帝爲宣帝皇后許平君之子，許平君爲霍光之妻毒殺，是以宣帝特愛元帝。元帝爲太子時，諫宣帝寬法而行仁政，宣帝怒曰：亂我家者，太子也。以元帝不知漢法爲骨，儒學爲表也。

太子愛妃司馬良娣早逝，從此不見姬妾。宣帝命王皇后覓得王政君爲太子妃。王政君爲后及太后六十一年，外戚從此專政焉！

元帝又獨好儒臣，及宦官石顯等逼死蕭望之，元帝優柔寡斷，亦無可如何。是故司馬光曰：孝元之爲君，易欺而難寤也。從此外戚，宦官，儒臣相交替，至王莽而亡。

二. 新莽篡位

漢成淫亂兮王鳳用事。
諫議不聽兮外戚始興。
悉封諸舅兮五侯欺世。
王氏四代兮太后長壽。
御史諫爭兮山崩蜀郡。
新莽亂政兮孝元權授。
竊位南面兮毒流諸夏。
復古改制兮周禮爲上。

改幣禁奴兮均田鹽鉄。
變官縣名兮民未得利。
河決元城兮汜濫諸郡。
堵口無力兮城邑爲墟。
赤眉起義兮聚師南陽。
續秀夾擊兮昆陽大敗。
綠林軍陷長安兮王莽授首。
光武轉戰河北兮東漢始興。

按：今世論史，多有憫王莽者。然而莽復古改制，逆時而行，百姓倒懸，又逢河決元城，災害諸郡，莽不能治，遂爲亂軍所殺。

王莽之亂，實始於漢成帝外戚專政。班固著漢書，言其姑爲班婕妤。班婕妤實爲有漢一代之才女也，詩品評五言詩，曰漢都尉後，將百年間，一婦人而已。班固叔伯侍班婕妤帷幄，得知成帝事，成帝善修儀容，博覽古今。公卿稱職，奏議可述也！然湛於女色，趙氏亂內，外家擅朝。自王鳳執國命，哀、平短祚，莽遂篡位矣。

三. 東漢

1. 光武中興

以寡敵眾兮昆陽大捷。
將相和睦兮光武中興。
鄧禹馮異兮賈復耿弇。
儒者氣象兮一氣所鍾。
郭氏爲后兮河北民悅。
銅馬毀敗兮兵容始盛。

大軍入蜀兮公孫覆滅。
力平隗囂兮隴右得暇。
東都洛陽兮麗華如願。
息肩中土兮克克競競。
收弓矢兮散馬牛。
退功臣兮進文吏。

按：光武固是一代英主，君臣和睦。與民休息，開東漢二百年天下，然而創意銳氣俱不如武帝。光武少時有志，曰「做官當為執金吾，娶妻當得陰麗華」，與高祖少時見始皇出遊曰「大丈夫當如此」辭氣不若遠甚！漢末諸葛亮出師表評東西漢成敗，曰「親賢臣，遠小人，此先漢所以興隆也。親小人，遠賢臣，此後漢所以傾頽也。」誠哉斯言。然而兩漢外戚用事，卒亡其國，「獨尊儒術，以孝治天下」之政策使然乎。

秦始皇廢封建，行郡縣制，蓋統一必然之路也。楚漢之際，項羽封六國後裔，卒至眾叛親離。而高祖軍敗彭城之後，幾欲聽酈食其之勸，分封六國之後。張良止之，高祖終悟周初分封諸侯之策不可繼也。

漢初功臣，異姓封王者八人，卒謀叛逆，終至滅亡者，何哉？韓信，彭越，英布漢初三大將，叛楚附漢，俱立大功。高祖定天下，封韓信楚王，彭越梁王，英布淮南王。此三王者，兵多地廣，勢比戰國七雄，高祖竟不能制！是故漢謀一統天下，非削藩不可！然而高祖擒韓信，捉彭越，均出於詐。爾後親征英布，惡其佈陣似項羽，高祖雖誅滅英布而被箭傷，可知三王之難平也。

高祖平定八王之後，遂有白馬之盟：非劉氏稱王

者，天下共擊之！並祝曰：國以永存，施及苗裔！俟後呂氏稱王，后死而天下共擊呂氏諸王，蓋追高祖之殊遇也。文帝時，淮南及濟北王謀逆，賈生獻治安策：眾建諸侯而少其力，削諸侯而實中央也。削藩遂生景帝時吳楚七國之亂！武帝時復用主父偃推恩令，諸侯弱而中央集權矣！

後世多有垢病高祖殺韓信誅彭越之事，其實二王之被誅，早種禍根於垓下之戰前。

初，高祖背信，棄項王以邳溝為界之約，三路追羽。韓信彭越竟不如高祖約，導致高祖一軍在固陵大敗！

張良遂勸高祖：楚兵且破，信越未有分地，其不至固宜，君王能與共天下，今可立致也。即不能，事未可知也。君王能自陳以東傳海，盡與韓信；睢陽以北至谷城，以與彭越；使各自為戰，則楚易敗也。

兵者，凶事也。而韓信彭越乘危而要脅高祖，誠小人哉！以後謀逆伏誅，不亦宜乎！

2. 明章之治

孝明承治兮倉廩實。

抑制豪強兮嚴宗室。

倡儒學兮重刑名。

尊先師兮正禮樂。

尚氣節兮崇廉恥。

賜公田兮興水利。

征北匈奴兮開疆拓土。

雲台圖畫兮二十八將。

黃河得治兮戶口滋殖。

尊崇儒學兮白虎論經。
民安其業兮明章盛世。
金人顯夢兮天子求問。
西渡葱嶺兮月氏覓佛。
永平十年兮漢使圓夢。
天竺沙門兮終生弘法。
徑千萬里兮白馬馱經。
寺建洛陽兮佛像遠來。

按：明章盛世，承光武之教，而不遜其德。雲台二十八將，所以記功，良有以也。

3. 竇固班超復定西域

伐北匈奴兮扶風竇固。
屯兵涼州兮出兵酒泉。
擊呼延王兮天山旋歸。
于闐驕橫兮幾並西疆，
都護西指兮眾才四九。
風雪交加兮笳音揚清。
定國五十兮強虜消逝。
遠索大秦兮遣使甘英。
幾窮西海兮止於條支。
延首東望兮慘切淒傷。
大漠經年兮顧瞻故鄉。
胡楊蒿黃兮枝枯葉乾，
沙場白骨兮刀痕箭瘢。
妹昭上書兮班侯得歸。
竇憲欺罔兮權傾當世，
遠出大漠兮燕然勒石。

匈奴敗北兮鮮卑始大。

按：北匈奴至東漢而復強，卒西逃遁，竇班二氏家族有大功焉，燕然勒石，自古稱之。惜乎竇憲藉太后而霸權，東漢外戚宦官之爭，竇氏有責焉，宜乎憲之被誅也。至於班超以三十六人襲殺匈奴使臣於大漠，威震西域諸國，有膽有識，千載下讀其故事，猶凜凜有生氣。定遠侯英年出使，皓首而歸，卒後，西域又亂，子班勇復平之。漢代使臣將相，俱能為國捨命，宜乎兩漢之盛也。

4. 永元之隆，桓靈之亂及黨錮之爭

孝和嗣世兮正身履道。
太后用事兮獨斷專行。
權傾朝廷兮竇氏兄弟。
帝臨北宮兮詔命校尉。
用中常侍兮計滅外戚。
宦官坐大兮禍至桓靈。
主荒政繆兮處士橫議。
臧否人物兮激濁揚清。
三君八俊兮天下景從。
身被淫刑兮禍及友朋。
士類殲滅兮國隨以亡。

第四章 魏晉南北朝

一. 曹氏篡漢

竇氏消亡兮宦官用事，

既誅陳蕃兮復殺竇武。
漢儒黨爭兮佞臣執政。
天下大饑兮常侍得寵。
張角崛起兮西羌復亂，
招兵涼州兮何進授首。
烝民塗炭兮王室覆蕩。
野無鷄鳴兮白骨千里。
董卓乘釁兮袁紹構難。
官渡大勝兮曹操無君。
北征烏桓兮蹋頓敗亡。
東臨碣石兮滄海揚鞭。
烏鵲南飛兮敗軍赤壁。
西伏隴右兮魏武遠征。
馬騰流竄兮韓遂敗亡。
匈奴日疏兮雜胡始壯。
三分天下兮曹丕篡位。

按：東漢末，生民塗炭。獻帝荒淫無能，勢必有變，民始得安！曹孟德弭平諸袁，北征烏桓匈奴，安定中原，功莫大焉！及其自度功比周召，大業可以速成，遂至兵敗赤壁，旋師北歸，奚足歎息。然而西平漢中，迅即恢復，可見其得人心及堅毅之志也。得隴而未敢望蜀，抑年老而志氣漸衰乎。

二．吳霸江東

圍伐董卓兮孫堅出衆。
戰死江表兮子策報仇。
霸取江東兮吳郡傷逝。
托弟周瑜兮孫權續位。

欲謀江夏兮聯備抗曹。
火攻赤壁兮孟德敗走。
白衣渡江兮陸遜代蒙。
偷襲荊州兮關羽授首。
玄德稱帝兮進軍夷陵。
猇亭大戰兮兵敗伯言。
駕崩白帝兮劉備托孤。
孫權稱帝兮改元黃龍。
南魯黨爭兮忠臣喪命。
身死族亂兮晉武伐吳。
旗落石頭兮王濬滅吳。

按：孫氏兄弟經營江東，抗曹拒蜀，重用周瑜陸遜，危然後安，善用良士而已矣。孫氏開發江南，至於閩粵臺灣，有大功與中國也。

三．蜀漢侷處西陲

靖王之後兮織席販履。
擊黃巾兮附孟德。
走荊州兮事劉表。
志漢業兮覓賢能。
風雪加兮顧孔明。
隆中應對兮知天下事。
聯吳抗曹兮孟德敗走。
欺璋入蜀兮取魏漢中。
孤軍北伐兮關羽毀敗。
秭歸蹉跎兮白帝托孤。
孔明開府兮法治益州。
五月渡瀘兮荊南始定。

兩表出師兮六出祁山。
未捷先死兮星沉五丈。
蔣琬輔政兮姜維爲將。
費禕繼任兮亂臣刺殺。
寵信黃皓兮眾將離心。
陰平偷渡兮鄧艾征伐。
劉禪降魏兮樂不思蜀。

按：劉玄德三顧茅廬，得孔明，法正而後興。惜乎入蜀而後，雖得漢中，未能撫平蜀地土族。又急於求成，關羽北伐，敗走麥城，然後東征孫吳，秭歸蹉跎。四方所聚之精英，散於一旦，誠可嘆也。及其身死白帝，托孤孔明，亦可知劉郎才氣，非常人所及也。孔明報先主之殊遇，六出祁山，惜乎人才未足，將無韓信，文無蕭何。是故星沈五丈原，亦無可如何之事。劉備托孤，謂君才倍於曹丕，可惜司馬懿才亦倍於丕。亮死，而後主遵從亮之遺奏，任用蔣琬、費禕、姜維，未如後人所述之無能，惜乎以後重用黃皓，亡國於鄧艾。至於歸命中原，中國一統，天下之大勢也，樂不思蜀，何足恨哉。

四．兩漢文學

漢承先秦兮郁郁典麗。
項劉歌誦兮猶好楚聲。
霸王拔山兮大風頌歌。
清遠流麗兮武帝秋風。
壯觀鴻奇兮瓠子天馬。
賈生過秦兮鵬鳥吊屈。

漢賦初興兮枚乘七發。
拓宇楚辭兮受命於詩。
宮殿苑囿兮巡遊田獵。
大賦藻飾兮腴辭雲構。
興廢繼絕兮潤色鴻業。
相如長門兮子虛上林。
緣情綺靡兮體物瀏亮。
楊雄甘泉兮河東羽獵。
諷諫鋪陳兮逐貧述志。
班固兩都兮鋪采摛文。
張衡感懷兮二京歸田。
小賦抒情兮班彪北征。
蔡邕述行兮彌衡鸚鵡。
史公著述兮黃帝迄漢。
雄邁古今兮史家絕唱。
斷代爲史兮班固評述。
妹昭續編兮漢書始成。
都尉送別兮五言之始。
百年一人兮婕妤團扇。
古詩溫麗兮清音遠浩。
指事造形兮窮情寫物。
悵悵切情兮五言冠冕。

按：唐韓愈文起八代之衰，然而倡議文必秦漢，於我心有戚戚焉！漢賦華麗，蓋其時國力最爲鼎盛，後無可比。而五言古樸溫麗，詩人詠歌，出於心，發乎情，穆穆棣棣，宜乎後世言中華文化者，必稱漢唐。

五．建安文學

文起建安兮俊才雲湧。
蔡邕飛白兮飲馬琴操。
聚賢鄴下兮魏武沉雄。
子桓清越兮陳思獨步。
洛神淑美兮詞采華茂。
辭賦淒滄兮五言騰踊。
亡家失身兮文姬悲憤。
典論論文兮七子並縱。
仲宣登樓兮陳琳飲馬。
公幹高風兮應璩雅深。
阮瑀章表兮偉長室思。
陳壽撰述兮三國敘事。
劉徽割圓兮專注九章。
兩漢朱華兮鄴水爲盛。
中原板蕩兮西涼稍安。
豪傑遠行兮山川形勝。
大漠蒼茫兮丹霞璀璨。
磊落使才兮慷慨任氣。

按：建安文學，承兩漢朱華，開隋唐盛世。蔡邕父女，三祖陳王，七子並馳，得五言之冠冕，極漢賦之朱華。

六．西晉

鄧艾西征兮偷渡陰平。
鍾會侵功兮司馬獨大。
樓船順流兮鉄鎖沉江。

旗落石頭兮王濬滅吳。
定都洛陽兮改元泰始。
世族復興兮汲汲求利。
承魏舉才兮九品取士。
唯能是用兮名節漸喪。
空談節儉兮晉武鬥富。
去州郡兵兮八王亂政。
胡族內遷兮強敵環伺。
晉議徙戎兮江統先導。
鮮卑不臣兮河西入侵。
匈奴復出兮并州崛起。
妄稱宗室兮僞劉遍阡，
永嘉大亂兮石勒橫行。
劉曜擄帝兮青衣行酒。
黎民不堪兮五胡亂華。

按：司馬篡曹，克蜀滅吳。世族復興，然而汲汲求利，名節漸喪，又無能處理東漢以來胡族內遷所產生之諸般問題，終至劉曜擄帝，石勒橫行，良可嘆也。

七．東晉

士族南遷兮建康稱帝。
黨同伐異兮抑壓吳地。
朱張顧陸兮王謝爲大。
權傾天下兮琅琊王氏。
譜牒爲則兮門閥士宦。
祖逖澄清兮渡江擊楫。
攻滅成漢兮桓溫北伐。

灞水旋師兮洛陽暫駐。
驕而恃眾兮喪軍慕容。
退守建業兮前秦滅燕。
篡位不果兮王謝護晉。
北府兵威兮大勝苻堅。
觀棋不語兮淝水謝安。
氣吞萬里兮寄奴如虎。
討滅桓玄兮興復晉室。
北擒慕容兮南梟盧循。
經略西北兮不果南歸。
西執姚泓兮滅絕後秦。
恭帝禪讓兮劉裕弑君。

按：晉室南遷，國祚長於西晉，蓋自孫權以還，北方士族，深入江左，根蒂已深，不易動搖矣。雖曰士族抑壓吳地，胡人勢力未逮江南。漢人精銳，盡集於此。中國門第，於斯為盛。然而抗拒外族南侵，王謝有大功焉。至於桓溫劉裕，北伐雖未成功，亦一代豪傑也。

八．前秦苻堅

坊頭入關兮苻氏崛起。
攻佔長安兮遂霸隴蜀。
氏族漢化兮任用漢臣。
既滅前燕兮又滅仇池。
西達葱嶺兮東極大海。
北至大漠兮南控江淮。
忠言逆耳兮期吞江南。
百萬軍散兮關中辱國。

按：苻堅任用王猛，漢化有成，然而根基未定，不聽王猛遺勸，欲吞東晉。全軍潰散，關中被辱，自刎而卒，亦可哀也。

九．北魏

鮮卑代興兮拓跋坐大。
定都平城兮攻掠後燕。
對峙劉宋兮西滅鄯善。
亡夏燕涼兮太武北統。
摩崖石窟兮雕塑遍野。
雲崗龍門兮隴西敦煌。
天水麥積兮永靖炳靈。
中西交融兮地理文學。
洛陽伽藍兮道元水經。
孝文漢化兮遷都洛陽。
根基未固兮六鎮民變。

按：北朝遍佈胡人，鮮卑拓拔氏漢化最深。中西文化交融，於斯為盛，延及隋唐。

十．魏晉清談

士求悅己兮唯美修容。
無為清淨兮道法自然。
駢賦協韻兮和聲天成。
梵音遠來兮經讀感懷。
黃老得尊兮儒學式微。
麗辭繽紛兮鏤心敷藻。

典雅擅長兮英華邁俗。
正始玄學兮何晏王弼。
祖述老莊兮以無爲本。
開物成務兮無往不存。
無名無譽兮佛道交融。

按：魏晉清談，史家詬病。然而中國歷代文人，未有如此時期文人求美和尊崇大自然之極致者。歷代以還，科學以應用爲主，基礎科學則以魏晉南北朝爲最盛，可比擬西方之文藝復興。惜乎隋唐科舉制度，盡毀此自由求美之精神。

十一．兩晉風流

才兼文墨兮右軍雄逸。
步兵詠懷兮情寄八方。
叔夜賦琴兮托喻清遠。
劉伶酒德兮向秀思舊。
披沙簡金兮陸機浮雲。
波瀾宏闊兮西征潘岳。
博物藏書兮清暢張華。
郭璞江賦兮彪炳磅礴。
靖節歸去兮自然超邁。
樂天知命兮葛洪抱朴。
化學得傳兮煉丹羅浮。

按：魏晉南北朝承兩漢之辭賦五言，漢賦進而爲俳賦，而繪畫書法，更是一時之盛，隋唐文學，溯源於此乎。

十二．佛法東來

流沙萬里兮震旦遠來。
敦煌菩薩兮月氏高僧。
大乘得譯兮般若法留。
龜茲苦讀兮母子修道。
羅什東來兮釋風漸行。
一十七載兮宏法涼州。
前秦遣將兮呂光奪佛。
後秦力邀兮鳩摩入京。
遠涉長安兮繙譯諸經，
法華金剛兮維摩三論。
子弟傳宗兮什門四聖。
譯本未全兮宏義未功。
法顯西遊兮留學天竺。
巒疊葱嶺兮木簇鷲峰。
朝行雪山兮夜渡冰川。
顧尋所經兮心動汗流。
去國十三兮終得戒律。
譯經建業兮摩訶僧祇。

按：佛教自天竺經大月氏而入中國。佛道交融，衝擊儒家思想，影響中國文化至鉅！

十三．劉宋蕭齊

七分天下兮劉宋四分。
中原未定兮拓跋爭雄。
元嘉伐魏兮倉惶北顧。
儒玄文史兮宋帝立館。

義慶新語兮言簡俊秀。
著書後漢兮范曄留名。
松之注述兮三國史成。
剩餘有理兮孫子經算。
籌學驟起兮二祖綴術，
跌宕起伏兮恨別江淹。
文典以怨兮詠史左思。
三都十年兮洛陽紙貴。
蕪城有賦兮鮑照悽愴。
靈運五言兮芙蓉出水。
延年白馬兮錯采鏤金。

按：劉宋國小，僻處南方，然而儒玄文學、籌算，歷學，均不遜於盛唐，豈東西交融，學者皆薈萃於江南乎。

十四 . 北齊北周

北魏衰敗兮國分東西。
高歡擁立兮定都鄴城。
孫洋篡位兮北齊淫逸。
北魏孝武兮西奔長安。
關中立國兮宇文權重。
既敗東魏兮復滅後梁。
恭帝禪讓兮北周始霸。
武帝奮威兮高齊毀敗，
主少國危兮楊堅篡位。

十五 . 蕭梁南陳

梁武佞佛兮捨身四度。
民窮財盡兮侯景作亂。
千里絕煙兮白骨成聚。
僧辯降敵兮北齊入境。
霸先篡位兮誅殺大將。
叔寶荒淫兮河山日下，
楊廣滅陳兮麗華匿井。
昭明集述兮始評文學。
劉勰文心兮鍾嶸詩品。
沈約四聲兮八詠傳世。
撰述宋史兮作賦麗人。
玉台新詠兮徐陵宮體。
哀賦江南兮庾信淒怨。
達摩東渡兮建業暫駐。
法救迷情兮一花五葉。
一葦渡江兮長蘆久住。
面壁九年兮禪宗始興。
玄佛交融兮隋唐延續。

按：梁陳二朝，民不聊生，然而中國文學批評，實始於此時，劉勰文心雕龍、鍾嶸詩品、昭明太子文選仍為現代探討古代文學之極品。沈約四聲八詠，庾信哀江南賦，詩人墨客，不可不讀。至於達摩創立禪宗。影響中國文化至深。此等大事，均發生於梁陳二朝，亦可異也。

十六·敦煌麥積石窟

高窟嵯峨兮千載經營。
壁畫塑像兮魏齊始盛，
飛天伎樂兮佛門史迹。
菩薩左右兮釋迦側臥。
玄黃色雜兮羅漢疊壁。
畫圖煥綺兮吐曜含章。
龍鳳呈瑞兮虎豹凝姿！
俯仰顧盼兮彤彩之飾？
流離爛漫兮霞馭雲蔚。
丹青并飾兮金玉同鑄。
神儀內瑩兮寶相外宣。
歸誠妙覺兮標志上玄。

按：莫高、炳靈、麥積諸洞窟，雕塑畫壁，西域藏書，俱可溯源至於北魏，千年建設積蓄，奚止中華之瓊寶，亦世界之遺珍也。

丘成桐

二零一八年八月十六日

延伸閱讀

►本刊第4期《數理與人文》一文有作者對於數理與人文創造力關聯性的深度剖析，第16期《如何在學術上學萬人敵》也有作者的賦，讀者可參照閱讀。



麥積山石窟佛像。(維基·anagoria 攝)